



**P R I M E
M I N I S T E R**

**DISKURSU HUSI
SUA EXELENIA PRIMEIRU MINISTRU
DR RUI MARIA DE ARAÚJO
IHA OKAZIAUN SERVISU DE ALVORADA BA ANZAC DAY**

**Dili
25 Abril de 2015**



Palácio do Governo,
Avenida Presidente Nicolau Lobato,
Dili, Timor-Leste

Exelénsia Embaixador Jonathan Schwass

Exelénsia Embaixador Peter Doyle

Vise-Almirante Mark Purcell husi Royal Australian Navy

Ida ne'e nu'udár onra boot ida atu halo diskursu ba Servisu de Alvorada hodi komemora loron Aniversáriu de Dezembarke ANZAC nian iha Gallipoli ba dala 100.

Ohin ita komemora sakrifísiu soldadu Australianu ho Neo Zelandés sira ne'ebé luta no mate iha batalla ida ne'e.

Ita hanoin hikas fali sira-nia sakrifísiu hodi defende independénsia ho liberdade iha ita-nia rejiaun no iha mundu tomak.

Iha Timor-Leste ita hatene liu husi ita-nia esperiénsia pesoál kona-ba soldadu Australianu ho Neo Zelandés sira nia aten-brani no profesionalizmu liu husi ita-nia esperiénsia hamutuk.

Durante Segunda Gerra Mundiál, komandu australianu na'in atus-tolu hatudu sira nia admirável reziliénsia no korajen hodi hala'o kampaña gerilla hasoru soladu japonés na'in rihun-sanulu iha ita-nia rain. Timor-oan barak mak ariska sira-nia vida hodi mak tulun soldadu australianu sira ne'e.

Kuandu ita-nia nasaun moris, soldadu australianu ho Neo Zelandés sira mak mai iha ne'e nu'udár InterFET hodi ajuda asegura pás atu ita bele hahú harii ita-nia rain.

Dala ida tan iha 2006, Austrália ho Nova Zelândia responde ba ita-nia sokorru hodi haruka forsas mai nu'udár parte husi Forsa de Estabilizasaun Internasionál.

Ohin ita hanoin hikas sira-nia esforsu hodi fó obrigadu ba ita-nia belun Austrália ho Nova Zelândia sira.

Señoras ho Señores,

Bainhira ita mai hamutuk iha rai-kloot ida ne'e – entre tasi ho foho Dili nian – ohin ita sei hanoin hikas fali destinu ne'ebé mak joven korajoza sira ne'ebé dezembarka iha Gallipoli tinan atus-ida liubá hasoru.

Bainhira ita fó-onra ba sira-nia istória, ita refleta fila fali, la'ós de'it ba sakrifísiu ne'ebé mak soldadu australianu ho Neo Zelandés sira fó, maibé ba mós ita-nia veteranu Timór-oan sira ne'ebé funu no mate iha ita-nia luta ba independénsia.

Liu husi konvite husi presidente nasional Australian Returned and Services League, ohin veteranu Timór-oan 50 resin mak sei partisipa iha marxa ANZAC Day nian iha sidade kapitál australianu hotu-hotu.

Timor-Leste sente profundamente onradu ba sinál de respeito ho solidaridade ida ne'e. Ami hatene katak ida ne'e nu'udár dalan ida ba povu Australianu atu komemora Timór-oan sira ne'ebé ho aten-brani fó tulun ba sira-nia soldadu iha Segunda Gerra Mundiál. Sinál ida ne'e mós refleta ita-nia relasaun profunda i esepiál ho povu australianu.

Returned and Services League ka RSL Austrália nian mós sei ajuda ita atu estabelese ita-nia asosiasaun veteranu rasik, Conselho dos Veteranos da Libertação Nacional. I ita sei aprende husi maneira extraordináriu ne'ebé mak australianu sira ho Neo Zelandés sira fó-onra no apoiu ba sira nia veteranu sira.

Ohin nu'udár loron ba reflesaun hodi komemora ema sira ne'ebé sakrifika sira-nia moris atu nune'e ita hotu bele hetan liberdade.

I ita fó-onra ba soldadu australianu ho Neo Zelandés sira ne'ebé mak serve iha Timor-Leste no mundu rai-klaran em nome da liberdade.

Obrigadu ua'in.

25de Abríl de2015
Dr Rui Maria de Araújo